



Til sveitarstjórna á Íslandi

Reykjavík, 9. júní 2020

Tilvísun ÞÍ: 2020040106/4.3

Leiðbeiningar um meðferð kjörskrárstofna vegna forsetakosninga 27. júní 2020

Með bréfi þessu er hverri sveitarstjórn send 3 eintök af kjörskrárstofni ásamt yfirliti yfir skiptingu kynja eftir kjördeildum vegna forsetakosninga sem fara fram laugardaginn 27. júní 2020.

I. Kjörskrárstofnar og kosningaréttur

Kjörskrá er gerð samkvæmt 1. mgr. 1. gr. laga nr. 36/1945 um framboð og kjör forseta Íslands, sbr. lög um kosningar til Alþingis nr. 24/2000 með síðari breytingum (kosningalög) og eiga allir þeir kosningarétt sem fullnægja eftirfarandi skilyrðum:

- eru íslenskir ríkisborgarar,
- eru orðnir 18 ára þegar kosning fer fram og
- eru skráðir með lögheimili í viðkomandi sveitarfélagi þremur vikum fyrir kjördag (6. júní 2020)

Enn fremur eru á kjörskrárstofni þeir íslenskir ríkisborgarar, sem lögheimili eiga erlendis en eiga kosningarétt samkvæmt 2. mgr. 1. gr., sbr. 2. gr. laga nr. 24/2000.

II. Kjörskrárstofnar

Sveitarstjórnir sjá um að kjörskrár séu gerðar en Þjóðskrá Íslands gefur út prentútgáfu kjörskrárstofna til afnota fyrir sveitarstjórnir.

Á hverri blaðsíðu koma fram upplýsingar um heiti sveitarfélags, kjörstað og kjördeild (hafi þær upplýsingar verið skráðar í kjördeildarkerfinu), auk blaðsíðunúmers innan sveitarfélags og raðnúmers kjósanda. Skjaldarmerki Íslands er staðsett efst í hægra horni hvers blaðsíðu og er svartlitað, gráir rastar afmarka leslínur og heimilisföng eru feitletruð.

Á kjörskrárstofni eru eftirtaldar upplýsingar um kjósendur skráðar:

- nafn,
- lögheimili,
- kyn og
- kennitala.



Hægra megin við kennitölu kjósenda eru tveir dálkar, þar sem setja skal krossmerki er kjósendur neyta atkvæðisréttar á kjördegi. Skulu krossmerki við nöfn karla sett í dálkinn með fyrirsögninni “Ka”, en krossmerki við nöfn kvenna í dálkinn með fyrirsögninni “Ko”. Á þetta að auðvelda talningu karl- og kvenkjósenda, en þeir skulu gefnir upp, hvor í sínu lagi, í skýrslu þeirri, sem hver undirkjörstjórn gerir um kosninguna. Eyðublöð fyrir þá skýrslu fá undirkjörstjórnir frá yfirkjörstjórnnum ásamt öðrum kosningagögnum, þegar þar að kemur.

Hafi sveitarfélag notað kjördeildakerfi Þjóðskrár Íslands við röðun heimilisfanga í kjördeildir og kjörstaði, þá prentast kjörskráin eftir þeirri röð. Þannig er fremst að finna kjörstað nr. 1 og tilheyrandi kjördeildir, því næst kjörstað nr. 2 og kjördeildir tilheyrandi þeim kjörstað og svo koll af kolli. Hafi sveitarfélag ekki notað kjördeildakerfið raðast kjörskráin eftir stafrófsröð götu- eða bæjarheitis. Á kjörskrárstofn í hverju sveitarfélagi raðast fremst þeir sem búsettir hafa verið erlendis lengur en 8 ár og síðan þeir sem búið hafa erlendis skemur en 8 ár, nema búið sé að raða þeim í ákveðna kjördeild. Hvorum hópnum um sig er raðað eftir stafrófsröð. Þar á eftir raðast þeir einstaklingar sem skráðir eru með lögheimili ótilgreint (var áður óstaðsettir í hús) í sveitarfélaginu, einnig í stafrófsröð.

III. Erlendir ríkisborgarar

Erlendir ríkisborgarar eiga ekki kosningarétt og eru því ekki á kjörskrárstofni. Eina undantekningin eru danskir ríkisborgarar, sem hafa kosningarétt samkvæmt lögum nr. 85/1946, þ.e. þeir sem voru búsettir á Íslandi 6. mars 1946 eða einhvern tíman á síðustu 10 árum fyrir þann tíma og hefur Þjóðskrár Íslands tekið á kjörskrárstofn þá Dani sem stofnuninni er kunnugt um að hafi kosningarétt samkvæmt lögnum.

IV. Íslendingar búsettir erlendis með kosningarétt

a) Erlendis búsettir skemur en 8 ár

Íslenskir ríkisborgarar, sem flutt hafa lögheimili sitt til útlanda eftir 1. desember 2011 og náð hafa 18 ára aldri á kjördag, eiga kosningarétt samkvæmt a-lið 2. mgr. 1. gr. kosningarlaga. Þessir einstaklingar eru teknir á kjörskrárstofn í því sveitarfélagi sem þeir áttu síðast skráð lögheimili, sbr. 1. mgr. 23. gr. kosningalaga.

b) Erlendis búsettir lengur en 8 ár

Íslenskir ríkisborgarar, sem flutt hafa lögheimili sitt til útlanda fyrir 1. desember 2011, verða teknir á kjörskrár við þessar kosningar hafi þeir sótt um það til Þjóðskrár Íslands fyrir 1. desember 2019, sbr. b-lið 2. mgr. 1. gr., sbr. 2. laga nr. 24/2000. Þessir einstaklingar eru teknir á kjörskrárstofn í því sveitarfélagi þar sem þeir áttu síðast skráð lögheimili, sbr. b-lið 1. mgr. 23. gr. kosningalaga.



V. Leiðrétting sveitarstjórnar á kjörskrá

Kjörskrárstofnar miðast við skráningu lögheimilis í sveitarfélagi eins og það er samkvæmt íbúaskrá þjóðskrár þremur vikum fyrir kjördag, þann 6. júní 2020. Óheimilt er að breyta kjörskrá ef tilkynning um nýtt lögheimili hefur ekki borist Þjóðskrá Íslands fyrir þann tíma.

Sveitarstjórnir sjá um að leiðrétta kjörskrárstofna eftir því sem tilefni er til. Helstu ástæður sem geta leitt til breytinga á kjörskrá samkvæmt þessu eru öflun eða missir ríkisfangs, andlát einstaklings, mistök við skráningu lögheimilis einstaklings eða því um líkt. Sveitarstjórn skal þegar taka til meðferðar athugasemdir er henni berast vegna kjörskrár og gera viðeigandi leiðréttingar á henni. Leiðréttingu má gera fram á kjördag, en óheimilt er að gera breytingar ef tilkynning um lögheimili hefur ekki borist Þjóðskrá Íslands í tæka tíð fyrir viðmiðunardag 6. júní 2020. Þannig skal ekki gera breytingar á skránni hafi einstaklingur flust til innan sveitarfélags eða milli sveitarfélaga eftir þann dag.

Sveitarstjórn skal einnig fram á kjördag leiðrétta kjörskrá ef henni berst vitneskja um andlát eða um að einhver hafi öðlast, eða eftir atvikum misst íslenskt ríkisfang. Þjóðskrá Íslands mun senda sveitarfélögunum slíkar upplýsingar er berast stofnuninni til skráningar á tímabilinu frá viðmiðunardegi fram að kosningum.

Leiðrétti sveitarstjórn kjörskrá, samkvæmt 27. gr. kosningarlaga, skal hún þegar tilkynna það hlutaðeigandi, svo og sveitarstjórn er mál getur varðað, sbr. 11. gr. laganna. Jafnframt skal tilkynna hlutaðeigandi kjörstjórn um leiðréttingu á kjörskrá.

a) Niðurfelling einstaklinga af skránni

Sveitarstjórn skal strika með bleki yfir línu (nafn og persónuupplýsingar) þeirra sem hún fellir af kjörskrá vegna leiðréttingar, og um leið gefa til kynna með skammstöfun framan við hlutaðeigandi nafn, hver sé ástæða útstrikunar. Útstrikunum og skammstöfun þeirra skal haga sem hér segir:

1. Skammstöfun: “**✕**” (krossmerki): Einstaklingur á skránni er látinn.
2. Skammstöfun: “**e. ísl.**”: Einstaklingur á skránni er ekki ísl. ríkisborgari.
3. Skammstöfun: “**mist.**”: Mistök við samningu kjörskrár.

b) Einstaklingar sem bætast á skrána

Einstaklingar sem bætast á skrána vegna leiðréttingar, ritast á milli lína meðal íbúa viðkomandi húss. Skal á þeim stað í kjörskránni, þar sem kjósandi ætti að vera, rita aftan við hlutaðeigandi heimilisfang: „*sjá viðb.*“ Ekki er gert ráð fyrir að sérstök viðbótareyðublöð þurfi til leiðréttinga.

1. Skammstöfun: “**mist.**”: Mistök við samningu kjörskrár.
2. Skammstöfun: “**ísl.**”: Einstaklingur hefur öðlast íslenskt ríkisfang

IV. Framlagning kjörskrár


Þegar sveitarstjórn hefur lokið yfirferð sinni um kjörskrárstofninn og samningu kjörskrár er þar með lokið, skal hún undirrituð í samræmi við 2. mgr. 24. gr. kosningalaga, þ.e. af oddvita sveitarstjórnar eða framkvæmdastjóra hennar.

Kjörskráin skal leggja fram almenningi til sýnis í síðasta lagi 10 dögum fyrir kjördag, sbr. 1. mgr. 26. gr. kosningarlaga, sem að þessu sinni er 17. júní og því um frídag að ræða. Í ljósi þessa skal leggja kjörskrána fram í síðasta lagi 16. júní n.k. Nægilegt er að staðfest endurrit sé lagt fram, sbr. 3. mgr. sömu greinar.

V. Annað

Öll kjörskráreintök, sem tekin eru í notkun, skulu fá sömu meðferð að því er varðar leiðréttingar og áritanir.

F.h. Þjóðskrár Íslands


Arný Guðrún Ólafsdóttir
Sérfræðingur

Afrit:

Sent öllum sveitarstjórnnum

Forsetakosningar 2020 - Kynjaskipting kjörskrár

Dalabyggð

Stjórnsýsluhús Dalasýslu		Karlar	Konur	Alls
Kjördeild:	1	244	225	469
Stjórnsýsluhús Dalasýslu		Karlar: 244	Konur: 225	Heildarfjöldi: 469
Dalabyggð		Karlar: 244	Konur: 225	Heildarfjöldi: 469